



5. marts 2010

UPA 2010/65

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiupparput:

Ingerlateqatigiiffiit pisortat pigisaat inuussutissarsiorerup ineriartortinneqarnissaanik aammalu inuussutissarsiornermik siunnersuinermik suliaqartut ataatsimoortinneqalernissaat siunertaralugu Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut.

(ATASSUT-ip Inatsisartunut ilaasortaataitai: Finn Karlsen, Siverth K. Heilmann, Knud Kristiansen)

Tunngavilersuut:

Naalakkersuinikkut annertuumik isumaqatigiittoqarpoq Kalaallit Nunaanni inuussutissarsiutinik ineriartortitsineq siuarsaavigineqassasoq, tassungalu atatillugu annertuumik aamma immitsinnut pilersornerulernissarput avammullu nioqqutissiornerulernissaq siunertaralugu isumaqatigiittoqarpoq inuussutissarsiutit siuarsaavigineqarnissaannut inatsisitigut, siunnersuinikkut aammalu toqqaannartumik tapersersuinikkut sinaakkutassat pitsaasuutinneqassasut.

Siunertaq pillugu taamak annertutigisumik isumaqatigiinneq inuiaqatigiit patajaatsumik peqqinnartumillu ineriartorusunnerannut ilisarnaataavoq aammalu aningaasarsiornikkut kiffaanngissuseqarnissamik siunertaqarnerannut aqutissiuineruvoq. Taamaattorli ATASSUT-mit isumaqarpugut inuussutissarsiutit ineriartortinneqarnissaannut pisortat peqataanerat ullumikkut pisariuvallaartoq aammalu aallartitsiumasunut suliffeqarfinnullu pioreersunut annertusaaniartunut paasiuminaappallaartoq.

Ullumikkummi ingerlatseqatigiiffiit pisortat pigisaat inuussutissarsiorerup siuarsarneqarnissaanik suliaqartut arlalissuit immikkut ingerlarsorput, assersuutigiinnarlugu Grønlands Turist- og Ehvervsråd A/S, Greenland Venture A/S, Greenland Development A/S matumani taaneqarsinnaapput, tamatumalu saniatigut aamma tamannarpiaq siunertaralugu kommunit aaqqissugaannik inuussutissarsiornermut siunnersuisunik ingerlatsisoqarpoq taakkulu Namminersorlutik Oqartussanut aamma isumaqatigiissuteqarput.

Tamakku ingerlanneqarneranni aamma naalakkersuinikkut kissaatigineqarpoq inuussutissarsiornermik siuarsaanermut suliniutit ”matu ataaseq” tunngavigalugu ingerlanneqassasut, tamatumunnga siunertaalluni aalajangersaasartunut minnerunngitsumillu periarfissanik atuisartunut paasiuminarlunilu ajornaatsuunissaa.

Siunnersuut manna aqutigalugu ATASSUT-mit qulakkeerumavarput nunatsinni inuussutissarsiutitigut siuarsaanermi pisortat peqataanerat ataatsimoortunngortinneqassasoq.

Taamaaliornikkut aaqqissuussineq ersarinnerulersinneqassammat aammalu isumarput naapertorlugu aningaasat siunertamut immikkoortinneqartartut siunertamut atorneqarnerat annertunerulersinneqassammat toqqaannartumillu siuarsaanermut atorneqalissammata, tassa siunnersuisarfiit siuarsaaviillu ataatsimoortinneqalernerisigut allaffissornikkut aningaasartuutit aammalu siulersuisuutinneqartartunut aningaasartuutit ikinnerulissammata il.il., paarlattuanillu inuussutissarsiortunut siuarsarnissaannullu aningaasaliissutit atorneqarnerulissammata.

Neriulluta siunnersuut ilassilluarneqarumaartoq taamatut tungavilersuuteqarluta Inatsisartunut saqqummiupparput.